

四庫全書

集部

欽定四庫全書

甬上耆舊詩卷二十九

監察御史胡文學編

胡處士一桂

字百藥萬厯中詩人隱居不仕余初見甬東詩括載  
百藥詩九首風華高綺自然可愛為錄存八首意中  
欽然思得盡百藥詩徧覓久之復從友人聞苕泉所  
得其四言詩一卷奇文與義識學兼造當是焦延壽

一流為後來詞人所絕無者讀之驚賞彌日其思得盡百藥詩文益甚既而知百藥死久矣有子曰傳字麟翼亦能詩周貞靖先生東茅山中麟翼常往來其間佛燈魚鼓時與共之麟翼來則負一橐中藏百藥遺草及所輯三百年典章四方文獻凡二十餘帙麟翼時與人誦其父詩及宅所著作欲去即負其橐去山中人無為錄存副本者今麟翼亦死矣求其橐中書絕不可得余每屬人入山覓百藥遺草至跪請之

近乃知麟翼有女嫁為農家婦在山中往問其家云  
前四五年尚有殘藁數本在織筐中今漸裂盡矣惟  
鈔得麟翼詩數首嗟夫百藥竟已矣夫以百藥之才  
格義理通古今使盡出其一生所作當有可觀而奄  
然散佚使名氏亦并不傳能無惋惜雖然自數十年  
以來斯文板蕩海內著述家盈篇巨策固有為天吳  
所沈為祝融所虐為長恩所不守為鐵脛銅馬人所  
齧其刀血遂已過如列缺棄如野燼飄如飛廉蒼狗

無復落在人間此正不知多少今百藥猶得存此一  
卷詩使後世與焦贛易辭並讀人風彷彿愜想其餘  
斯猶百藥之幸也且余于百藥力亦盡矣

四言詩

殷仁殷喪辛不庸棄漢傑漢興季能展使騰蛇游霧神  
龍難次騏驎阮車駕馬何異游霧傑稱阮車仁被

日出于卯兔屬兔宅斯惟兔宅月中聚積月出于酉雞  
屬雞宅斯唯雞宅日中聚積陰陽之精互藏其宅

雖有玉壺必求盛擲雖有干將必求斷割無盛之壺何貴砥院不斷之劍何有合伯

龜之刳腸非殼靈為麝之決腹非臍香異靈自去靈保其殼易香自去香固其臍至藏用則宜去賢乃智

五運六氣乾坤終始于月之初五運皆起天氣先至乾知大始于月之終六氣皆出地氣後應坤作成物

水波風激心欲物觸風息波止水性靜淥物化欲留心不靜浴未來覲覲已往繫束不風而波譬猶耽毒迫而

後動過而不局善治心者如水斯足

鳥不甲龜于其羽足魚不趾獸于其鬣足人曷自足自足者足

易道扶陽陰乃是抑卦位貴中賤彼乃極陽過于極雖剛吉匿陰得其中雖柔凶熄

閭然之章非暴使著精斂乃吐光弢則露顧鹿戴玉而角斑素即魚懷珠而鱗紫聚誰云小物可以大喻

晞驥而驥非以力別晞聖而聖非以迹說迹晞放伐天

下心熱力睎絕景鳴鸞不節湯武焉為騷裏焉列睎驥  
以德睎聖必哲

心猶明鏡昧者塵宿鑄形之初焉有塵蓄聖人洗心其  
初也獨君子治心其初也復庶民任心其初也戮

玄龜食蟒餽餽時坐飛鼠斷猿虬嗇膽破狼蝨嚙鶴餽  
餽折剉青要食虎利遴不貨在氣非形以小制大

醑酒乳漱天乳哺侑亡殷牛飲敗楚虎酌成禮將德百  
拜三授賞為歡伯懲則禍首



禦績勝賊捕賊能迄強圉勝虎捕虎不屈克已成已勝  
物成物

文至周末爛汗雲列羣言之勝微言之絕師師道道爭  
筆戰舌物極必銷秦火乃藝

蝦蟹離象外堅內姤離中含陰陰中生害故其育也子綴腹外  
問消搖游

消如陽動而水乃消搖如舟行而水自搖消也本固動  
也內饒游世若是體道其昭

狗伍突卒吠狴息歇一投以骨張牙噬齧利小人骨平  
居耦厥剖心瀝卹錙銖唐突反目爭勃狼戾危碗遠小  
人羣遠以利蠅

前惟孔融氣維漢歷奚與建安七子並列後有駱丞扶  
唐一檄奚與垂拱並稱四傑誰為品目昧其優劣文章  
藝小倬彼大節

火在井中不能燎原目在足下不可視禪國之治亂日  
之明昏居高則明燭遠斯尊

虎嘯風生風生籟號虎伏風息風息籟逃止樂以敵聲  
音不悽

四絃一德

勇以氣鼓聖人正色賢以義鼓暴君意激勇義昌分神  
結氣即鼓者不知鼓鼓不識心手與瑟精行其側

風生于無而歸于無竅受不同人聞亦殊衆竅之鳴風  
鳴之夫衆形之役化役之于風不能鳴衆竅畢遁化不  
能役衆形息吁

地上陽室客陰來脅和為雨溢地下陰密客陽來脅散  
為風疾雨從天降風從地出

飛鳥為陽食也果梁天陽氣嘗走獸為陰食也芻糧地  
陰氣將

吳興九里石塘即事

路出桑陰盡澄湖野望賒菱歌依岸柳舟影入蘆花烟  
起迷邨白雲移見日斜異鄉風景在羈客倍思家

隱淪

白鶴山前住居然一隱淪  
豆苗分別圃樹葉護南隣  
榮啟良多樂原思不厭貧  
牀頭春酒熟一醉月華新

從固陵江氏訪碩父于來氏塾中幾不得路

南風吹暑拂牆花一望葱菁麥隴斜  
江路有雲連別島野田無路到山家  
徘徊欲問前途馬得宿慙非後至鴉  
相見不嫌談夜半翻嫌此日咏蒹葭

桃源齋居

比隣喜得攜琴好笑語何愁行路難  
天為山人開子墨

客言幽谷是王官霜飛已失千林翠寒重猶存一葉丹  
綠酒漸深詩漸老好風吹月墮闌干

寓里中何氏折而南緣崖水竹青翠交加

平生最喜尋幽勝卻羨村居近綠波水鳥每從蔬徑落  
荷香偏傍竹林多小樓晝畫溪還靜中夜山陰棹欲過  
更喜灌園人自老家家瓜菰翳烟蘿

秋日西行至下壩作

參差原隰短長隄蕭瑟蘆花野望迷大樹夕陽潮落半

布帆流水客來齊風塵涉歷朱顏改家計荒涼白屋低  
纔一出門歸思起滿懷孤悶入新題

壬戌十二月二日即事

落魄徒然老鵲冠一宵鐘鼓坐來殘薄雲欲雨花谿暝  
新月初生子夜闌客思紆迴波九曲新詩題徧竹千竿  
湖邊磐石能容我且對鳬鷺盡客懽

兒寓西隣華氏先君寓華之西陸氏中限一水

時復緣涯而語

野水平橋外烟光亂鳥啼迴塘相對語只是隔東西

胡傳

附

字麟翼百藥子也見前傳

江行

濛濛疎雨霽隔樹見人家白水侵茅屋青山隱菜花  
倚童撿押韻漁火試新茶入夜孤燈夢先知到若耶

春江可憐色況復柳條青風定櫓聲細潮歸水氣腥  
窓中望東海雲裏辨南屏詩思朝霞變風塵眼一醒



秋夜

欹枕獨不寐秋生明月階  
候蟲欺久客飢鼠怨空齋  
故國渺鴻雁邊聲愁虎豺  
倦游輕薄子今夜苦為懷

吳山人士瑋

字潛玉號曰笨子為諸生數試有司不利遂挾其詩  
客都下足跡徧吳粵豫楚間笨子負才氣喜與奇人  
魁士交人亦翕然稱吳生過文江時鄒南皋先生方  
歸里門笨子上詩有曰到來天地傷多事歸去江湖

尚有人一時誦之鄒先生為叙其游草曰文江詩選  
笨子老客溫陵食荔支酣甚數日中作詩百首名曰  
荔品百咏余所見笨子詩此二種而已聞其他著作  
甚多苦覓不得見客有過余論詩者曰先生甚喜笨  
子詩何句最佳余謂笨子詩如曰身老喚人看國色  
此語意極佳亦極可歎余近來看年少中奇文字自  
顧衰老不能為揚聲輒呼諸名士讀之坐上有名酒  
以病欲飲不得使吾友盡觴望高崖峭壁患氣不能

上促同游健者造其勝俱與笨子同此懷也笨子又  
曰寶刀出土懸空壁老馬隨人看種田詞義亦極慷  
慨

余錄笨子荔品詩至十首其餘奇句甚多更為標出  
如曰繡閣分香烏鵲腦玄房劈斧玉蟾蜍曰落日呼  
童收末利晚風岸幘把琅玕曰清過葡萄應更遠味  
超橄欖不須回曰眼見春花鵲鳩雨口甜秋實鷓鴣  
天曰白擎龍女將珠獻紅戴雞人賽幘來曰美過豹

胎難等量香子雞舌沒中邊曰軍持並解甘泉浸華  
蓋重懸佛頂珠曰誇道留人多海錯還將落句劃江  
烟曰南面湖中看晝夜東頭巷底語行藏曰黃颺乍  
驚雷海笑紅毛未到電村虛曰燭龍照夜分珠綴天  
馬行空駕火流曰髮禿桂花開後見手香橙子剖前  
知曰閒情一點松燈照塵念三杯米汁移曰穿河貯  
水雲為帶壘石成山霧作巾此等不可盡舉笨子時  
年已六十餘尚奇麗涌出若此聞其有品菊百咏惜

未見之

除夕

時寓雲間

守歲為團圓曰余獨遠客酌酒至三更兩歲分一夕庭  
燒楮杻紅地畫平安白雞鳴帶雨聲愁絕文章伯

聞錢孝直陳情俞旨將父歸里志喜寄贈二首

江上雙青眼因風到掖垣誰知返戈力方遂舞衣懽雲  
散江樓迴春生水國寬皇恩終可恃披腹盡琅玕

地偏留朗月林響屬飛泉老去聞奇事歡來可盡年雁

行看競爽魚素識沈縣星緯原無秘曾為海客傳

歲暮思家

偶滯天之涯窮愁忘歲華三年惟有淚五十反無家旅  
食同秋雁歸心愧暮鴉不禁千里夢夜夜到梅花

懷友

我輩原無事何難四遠尋布衾垂宇宙芒屨下山林出  
世惟多髮憂時但有心邊關烽堠急直恐廢高吟

寄子

忍別思何處臨平下第辰兩湖容面熱獨樹守家貧場  
屋無文字衣冠即鬼神可寧念衰老歲晏在風塵

憶孫

念汝兄弟好別來誰解願應門相喚客逢食各呼伊是  
出牽衣問今歸擲果遲太平仍可待老少定歡隨

苦雨

沈沈山縣雨霖霖熟梅天對食心先飽攤書坐屢遷蟻  
簷皆見埵蝸壁半塗涎不出池塘蛤殷勤伴獨眠

端午

向來真寂歷誰復報佳辰  
苜蓿空留客菖蒲不醉人  
環山梅熟雨滿室地生鱗  
憶昔逢迎者于今白髮新

過景福菴

旅中嫌久病行藥到禪關  
日落常歸鳥雲閒不蔽山  
塵勞無念了般若即時還  
兀坐忘身世青天度白鵬

墮牙

衰微已中歲齒落豈相期  
多智慚于馬貪心待至齟  
齟醉



花吟未穩問月嘯還奇壯志何曾改從人笑老癡

歲暮雜咏

穆穆歲將晏栖栖歸未期短衣乘日補破牖任風吹防  
世應如病全生莫過癡百年鼎鼎在醒者欲何為

為客只如此時時畏出門林聲寒鳥集山影宿雲屯世  
味存雞肋生涯問犢禪終朝惟靜坐大雪照黃昏

謾說他鄉苦他鄉也自便忘形黃閣老得意白雲篇茗  
汁山中雨鑪香海外烟出門狎隣叟鶴嘴就衣牽

憶自登高後仙人若我招從龍雲不斷伏鵠氣難銷仙  
橘藏封帶江魚賣縛腰安安好風景唱唱小歌謠

下榻苔溪上芙蓉滿戶庭憂時天欲墮說劍日為停古  
誼看凌漢高譚喜建瓴還君天祿去藜火幾時青

名園時入想家釀幾回傾鳥下枝頭重花開醉眼睛憐  
才皆古意悅客度新聲會得千秋事風流起後生

乘月望婁江因風命小艘斯人居北郭寄傲在南窓諾  
重黃金百名齊白璧雙元龍雖豪氣一見已心降

卷二十九  
此夕獨愁予王孫亦索居春歸先歲底臘盡稍更餘淑  
氣隨開鑰辛盤見雜蒨來朝應鬢改壯志復何如

陸侍御湖上涵虛閣落成

空明無處不宜人柱史樓臺喜更新能事漫酬千載願  
閒情且傍十洲親山來座右時為主月到湖頭亦作賓  
莫惜倚闌同嘯傲題詩王翰在南隣

元旦試筆

今朝隨俗寫宜春未便商歌動四隣浪說補天多煉石

空傳潛地有神人  
漁陽守戍師真老  
蜀道招魂鬼又新  
正恐江湖高枕處  
夜深雞犬亦踈踈

張韶州遺端硯答詩

筆花五采夢頻頻  
再拜高情贈結隣  
南海片雲分豹尾  
西偏剩水割龍鱗  
風迴篠簜閒逾止  
雨過芭蕉靜絕塵  
拂拭細書江海賦  
誰言一字賣堪貧

初夏柬友人

滿庭青草訝簷齊  
倚杖同誰病眼迷  
象渚分龍雲自合

鰲溪無蟹月空低攢眉老子寧關酒驚骨騎人重問驪  
久擅南山從不借君來別掃鑑湖西

遣懷

摩空獨鵠渾如蓋出岫孤雲更似輪米汁已防涓滴醉  
水精相戒齒牙嗔情知舊雨非新雨病過初春及未春  
藥石千金猶不貴向來地主屬何人

過文江謁少保鄒南皋先生賦贈

四十餘年社稷身東山雲物獨教親到來天地傷多事

歸去江湖尚有人一疏曾聞推虎豹千秋已見上麒麟  
為園深谷無他好但種葵花就日新

贈龍華寺玄宗住持

郭外招提古木林山門一嘯遇知音題詩青竹皆無語  
拄杖蒼苔各有心夜送神燈常北焰江縣螺髻獨南臨  
閒來幽賞殊難徧他日猶憑夢裏尋

荔品

開門倚杖日曛曛香送千巖萬壑風抱膝樹根情已適

枕流石上趣誰同  
輕翻酒帽梨花白  
遙見簾衣柿蒂紅  
不怕四聞簫鼓沸  
前身領過蔡珠宮

龍目晶瑩且漫題  
蚌胎的皪滿筐攜  
遠人錯認呼盧橘  
詞客因之賦病梨  
撇卻持螯金琥珀  
想來捫蝨水玻璃  
夜深常得催詩候  
月落初聲兩岸雞

呼來竹裏喫時新  
果識清香白蜜真  
願得幾回飽欲死  
儘將百萬買堪貧  
初鮮味合江瑤柱  
久嘗尊傾石凍春  
笑謂居停金玉道  
蔡家圖譜欠精神

紅顏朱果醉酖醺虎視鯨吞興更豪  
顙落火雲排孔雀核堆繡字作蟻螯  
盲風酸雨留華屋短榻長牋放弱毫  
卻笑杜陵饒未得蜀人舉贈只櫻桃

交嘉朱紫爛盈筐愛喫何如細品嘗  
要識味全須帶露無疑色好似經霜  
破除遷客陰陽火轂輾詞人錦繡腸  
日到朗園吟數過聲名為感齒牙香

荷墅松風最可憐小池片石任高眠  
靈山倒接青棠影丹荔平燒綠野烟  
櫂轉湖心波濫濫魚游浦面葉田田



倏逢僊子霞墩上喜過洪厓左拍肩

名果分嘗及二毛未曾下嚙豫揮毫明霞照水盤中玉  
甘露翻為古上濤姊妹嬌花憐並蒂弟兄幽鳥有同袍  
奇情賦了無人會除是蘭陵賣酒豪

樂土炎方別有天不惟百果荔爭先三收蔗課糖贏米  
萬頃魚秧海作田蠓柱波般愁鬼臉桐城日鑄霸王鞭

五陵游俠皆年少慣使通番呂宋錢

五六皆閩中土語

攢食爭先興未闌大家評跋質青山白嗔蒼葛連唇澀

紅笑檳榔著齒殷促膝雅尊盤席飲辟人深戶映花欄  
懷中不律空閒過草木春秋刪又刪

翠微麗矚此新亭醉客時傾碧玉瓶河鳥一雙眠渚白  
海螺數點接天青泉通屋脊晴疑雨月到巖頭醉又醒  
廿載重來圖畫裏亂吞丹荔不曾停

賦得蕭郎

南山日暖北山涼兩岸花開一岸香卻怪有情梁上燕  
教人好語到蕭郎

雨中懷孝廉楊元章

蕭齋有客思無涯  
雨浸梅根雪壓花  
忽記玉山顏未得  
美人作意試琵琶

纖手雙鬟拍拍成  
佳人催到不呼名  
天邊鴻雁如相助  
調轉瀟湘又幾聲

竹枝詞

溪上鴛鴦太煞騷  
三三五五濯波來  
沙搏龜蟹欺雞冠  
溜急魚蝦夾蚌胎

題畫梅送毛君之武林

磅礴無人興自豪  
香風為我拂霜毫  
幾回細寫孤山影  
絕似西陵第一橋

全公子大震

字二何玄洲學士次子也少負異才治詩古文詞精  
書法身既貴公子性任誕復為吳中勢人壻婦裝數  
萬二何隨手而盡里中陸文虎先生最持標格獨心  
折二何與通婚姻既七試不利家日貧落托因作客

長安中久無所遇益放浪自廢其後竟客死故人家  
識者哀之余少時嘗見二何樂府七言律十餘首詞  
甚橫絕可喜及余客白下寓太常莊漢曉先生官舍  
中見二何數造門莊先生必為設食將徹出袖中一  
油楮裹其殘炙去率如是其客窮至此相去三十年  
余始選甬上耆舊詩因憶二何諸作從里中徧索其  
遺草所錄示率皆俳謔漫語與余向所喜絕不類久  
之乃自其從弟完白所得二何存集十帙之四急發

而讀之見其詩文襍鈔畧無去取即訟詞要曲詈僕  
罵鬼涕唾夾恩無不錄其中二何手題卷首謂萬不  
許示人使後生輩得入其室窺見老生生平其語良  
是余因念二何平日詩文既不能自慎擇所僅傳者  
又俱其晚年謔浪幾使老氣盡掩將來風雅豈尚有  
二何一坐心竊傷之乃特為洗硯正席取四帙中詩  
審定之唯存其本色蒼健者三十首其餘刪抹至盡  
然後此老身後精響始大白于天下若自今日始得

一詩人焉憶初冬梨洲黃先生相過見余選里中詩  
輒問所錄全二何多少蓋黃先生猶記文虎之言也  
余時尚未得二何一詩默無以應今日始可以答黃  
先生矣至余少所見二何詩終無一在者乃知所亡  
六帙正有妙絕處行苦覓之第余于二何詩即未得  
盡存其可傳者而已得力去其必不可傳者此則余  
愛二何宿心也即二何而在當許以此卷示人矣

四言詩

飲食之精草木之華集我丹田我丹所家我丹伊何鉛  
汞丹砂客主相守如巢養鷄培以戊己耕以赤蛇化以  
丙丁滋以河車乃根乃株乃實乃華書煉于日赫然丹  
霞夜浴于月皓焉素葩金丹自成曰思無邪

采蓮曲

大把荷花細把拏不愁船小日西斜香風吹得郎心轉  
夢也應須一到家

菱花秀出葉了又翠蓋過頭戴到家葉葉裁為儂袖子



只餘儂面作荷花

送萬履安下第歸明州

鯢魚起海水瞬息千萬里偶然意不得良亦嗒然已釣  
弩在我手摧撞胡遽靡達人營實腹志士拊空髀吐吐  
深源生終焉資笑耳

雲間每樂樂始平比寥寥余最負世僂凶閔亦薦交蹠  
踈京邑塵玄亭莫解嘲仗子小吐氣秋空摩健鵬相與  
望浮雲遂可屏牢騷復賴茲弦器為君中夜操二三弟

兄情庸得昧久要

昔聞高賢心登用乃滋懼張羅網四海章滿公車路逆  
旅占掃人荷甌有不顧何至企同時起家但詞賦遠大  
論樂生榮名宜少慕

禮稱重其死余生殊味寡內虧罔極義外負金石雅自  
獻七見刖飲泣輦轂下君來頗復同報罷惜董賈起舞  
春風顛侘傺空自寫區區將母情爾我一致也水西丈  
室地會有比肩者

酒壘峰歌

虔州客舍面一峰甚奇土人呼為酒壘峰余日與坐對歌以記之

山峰隗俄矗一个我受其朝如受賀太常修齋殊少日  
麴部新拜尚書大將無其下即糟丘安置風流酒人座  
峰下會起黃公壚峰前試喚劉白墮嗟我中年苦酣放  
那能咄咄書空坐隱几醺醺萬古醺橫窓酩酊千春過  
不妨自作醺雞目取便亦宜葛巾浣砭耳雙柑逐衆攜  
埋身一鋪隨方荷卧銷遊絲並白日醉嚮湘靈同楚些  
卻笑尹吾閉戶生尚無隣眼來窺破

京口訪王翼明遂辱三山之約

金沙舳艫千萬艘孤舟夜驚江怒號朝登浮圖觸鼉背  
神仙不來為我曹城西故人有王大散步尋之正愁坐  
指天畫地感慨同相憐不異淮陰餓汝家亦有三山乎  
若醉莫怪全生麤登臨原是丈夫事還期努力麒麟圖

古意

相逢牛飲去夜見斗芒寒釣叟虹為綫屠家鐵作肝千  
金酬死易一擲報恩拚世上螭蜥輩何曾挂舌端

舟中作

極想支機石時乘破浪帆  
精強虛竹杖瀟洒換春衫  
鶴雀高忘倦鷓鴣急帶饒  
驚心惟一劍終夜不安函

加飧

每慕安貧語何人與論安  
狂來能捫蝨愁絕即加飧  
貂毳嗟寒計風霜弔旅翰  
四方非靖日生事未宜完

苦憶

久作無家夢何堪兩地身  
小駒絲繫命

兒子阿駒

祖母鬢吹

銀霜氣催歸興燈花結喜神故園當菜熟堂上是何人

有家

荒荒擲歲華三載蕩天涯狼藉移雙鬢間關散五蛇  
碁催南浦怨風送北堂嗟夢轉雞鳴候猶知是有家

京邸步侯汝戡見留小酌韻

靜榻寒尤下閒門晝亦扃烘春延襟卉聚海饌羣腥蔣  
詡容開徑揚雄獨勘經片時成古道端不愧沈冥

故西川提舉玉海李府君輓章

吏隱何工拙馳驅蜀道難錦江迴大篆鹽井燭餘寒韉  
烏寧留犢巾車幾到官茂陵有遺草好付所忠看

欸客中山甌先教主不醒斯文誰後死大雅竟沈冥肅  
見元龍禮懋占太白星六峰凭几處便作異常青

歸懷

蘭亭禹穴濶音徽萬壑千巖幾振衣四海虛名原誤世  
十年醜婦解忘機幾聞白石歌來爛已惜朱顏鏡裏非  
不厭避人幽意在何時管領釣魚磯

竹邊開牖復誅茅  
夜夜蟠虬雜怒蛟  
客到寒雲圍蠟燭  
酒深明月照山肴  
何人強欲馴龍性  
有主還須識燕巢  
容易陸沈驚歲晚  
新詩加意作推敲

春日集陸伯奮東樓

委巷層城瞰玉樓  
登臨春色共銷憂  
高來呼噲應須賦  
濶處湖天別有洲  
投轄肯教虛座上  
捉刀若個在牀頭  
欲拚十日平原飲  
酒力來朝未可謀

報國寺雙松



神人移植自徂徠，豈是秦廷受爵材。  
禿頂卧篩涼夜月，低柯舞襯碧堦苔。  
風霜多日隨身飽，鱗甲從人對面猜。  
萬壑寒濤鳴謾謾，雙龍長護帝城隈。

謝侯十二汝容秘書，屢見招尋無于尊公中憲。  
追國士之感，附見末韻。

尊酒招尋夜似年，夷門主道倒還顛。  
春依楮社爐邊煖，霜爛芙蓉匣底鮮。  
楚調章章逢世難，浮生日日為人憐。  
竹林曾歎山河邈，知己悲鳴倍惘然。

家信至有浪傳余已應吏牒者率此感示

蛾眉羞學漢宮彎骨相寧參鵷鷺班未得捧輿先改鬢  
倘教受檄或開顏那能手版論西爽似有移文累北山  
夙昔廢庠殘火在月明還佇大刀環

陟岵殘編汨眼零空傳家學是韋經犧牛未悉登何廟  
丘壑應須置此形白玉堂中違故簡石窓峰頂憶青櫺  
可憐未報君親意只許江湖號客星

李克振新葺書樓喜贈

莫問仙源幾處花花枝豔處即君家樓檐獵獵支風軟  
橋板低低趁水斜來去一年新社燕榮枯五色故侯瓜  
登高須仗興公賦雉堞時容睨海霞

南閣成志喜

齋閣新成逸興長倦游心事合商量屋梢明月低還見  
樹頂危巢逼不妨乞巧未堪陳几簞窺林已足管牛羊  
誰嫌四壁無餘物猶喜高懸一鷗鷺

擬皖城賊遜奏捷志喜同留部諸公作

不常憂喜態言捷便欣然北上音何緩南來膝屢前駿  
功馳赫濯文德協重玄草澤終麋駭山河自礪鐫桐陂  
張勝壘皖口壓雄川斷後曾臨操堅中故騁權股肱分  
要輔湯沐枕駢肩羣醜俄成敵諸城乍警弦久縣帷幄  
劍數假便宜牋仍有王師戰寧論國鉞虔搗巢停石畫  
間黨沮鉤連出沒渾難測來迴杳莫牽神機貴尊俎妙  
筭後戈鋌直賴鐘簾福還惟社稷緣稍防蹂晉豫復截  
闐秦汧窮蹙那知地狂奔永逆天游魂迷淞霧野燒等

飄烟王氣原留楚歡聲徑達燕宵衣需泮獻露布走星  
傳橫賜傾周寶崇酺狹漢錢願衰彛鼎業磐石鞏巖邊

贈汝戡

鏌耶一片向誰明擊筑聲中見不平匹馬斜陽殊作俠  
過從長是問侯生

天家大事萬年籌龜坎蝸廬足自謀解道安危諸老在

如今杞國費誰憂

汝戡杞人

狂馳直任百年中燕市流行氣作虹草莽文章終孟浪

防將時事忤三公

吳先生應雷

字鼓和號曰青衮為諸生家貧授經世居甬上凡甬  
上諸生無不出吳先生門者先生雖日為諸生論說  
治經生業然几上獨置杜工部集每歲以反故紙立  
一冊凡有所作輒書冊中有事則藏諸巾箱方去即  
其家子弟亦不知先生日何所作也久之先生故人  
子及諸生與其子謀俟先生出竊發其中箱視之則

其所作詩草也紙背中淡墨禿穎幾不可讀因各取  
一冊疾書之仍置箱中此後見先生裴回戶庭間口  
吟手畫始知為作詩也然終不以示人聞人論詩輒  
不答唯見人以詩書扇上贈人輒戲額曰奚自苦但  
持一素扇相贈亦得生風奚重廢筆墨為竟藏其詩  
至老且死終不自言嗟夫吳先生生不得與葉鄭朗  
楊伯翼同時其目中所見鹿鹿誰足與語故寧抱其  
詩并枯壁壞蠹魚飽死篋中終不肯使單章隻句輕

上俗人口此其力堅其志矯寧身後千百年待一人  
知己始出亦可謂介之甚果之甚矣去先生二十餘  
年余始錄甬上耆舊詩適允誠出宿錢氏錢氏賢者  
二咸戒三即先生故人子因出向所鈔詩數本夜讀  
之中有經吾友錢退山點定者允誠為驚喜錄百餘  
首來賞歎彌日即余門中向與先生往來者聞其能  
詩俱大詫不信嗟夫吳先生誠異人也雖然先生身  
後甫二十餘年侯芭尚在已有能讀太玄如桓君山



張河間者吾知先生更喜過望矣

感懷

恣恣山中桂乃與庶草殖螻蟻穴其根生意頗踞脊一朝遭運會移置宮苑側敷榮日以鮮馨香當坐發風霜亦何勁枝幹終自及君子秉本性小人量續息美葛枯于野嘉稷委于澤抱質豈不臧賦性任所適得失原茫茫舉杯對明月

感興

蕩蕩仰天宇白雲橫野亭人生如孤蟬須當及時鳴薄  
翼領微風高樹揚清聲一旦入秋節白露肅泠泠垂綫  
豈能長抱葉為乾螻神龍有奮螫時花一枯榮造物移  
人意無然命獨醒

感懷

嚴冬天雨雪寒氣薄人體方朝尚偃卧巾蔽窓戶裏自  
分衣裳單白頭忘櫛洗飢叩誰家門愁憶何王醴萬慮  
一身併鬱若魚出水天子御北辰安知窮邨士溝壑日

為隣歲莫亦云已

游目寫中懷躋攀俯城郭江流半夕陽夕陽多野哭遠  
望令我愁天風振瓦屋歲敗人烟少村寒啼鳥獨妖狐  
銜觴體白鷺起叢薄安得懷葛世忘情順里俗感喟非  
一端昏歸意煩促

居恒不得志曠然興遐思遐思在三山仙侶與追隨或  
跨白鹿行或挾胎禽嬉沆瀣可供飯紫芝以充飢洞壑  
何閒閒彷彿雲霞栖學道恨太晚全真方自茲安能靡

塵蹤熬蟻無休期堂上考鼓鐘行樂當及時達者信其  
說徒為愚者嗤

蘿蔓

蘿蔓緣桑樹樹高蔓亦長傾柯滴涼雨罨葉晞夕陽柔  
勁豈偏妒枯苑相與常所嗟物候改促節入清商百卉  
落顏色微質何足臧桑脫尚有枝蘿謝根亦傷儵忽棄  
捐早結軫摧中腸願言駐陽和永永媚年光天意故叵  
測撫事授斯章

醉哉行

吳生好飲席天地手搦寸管咎五帝帝曰怪哉敢侮予  
勅使窮村閉門去閉門十日那肯靜撥上南城目更騁  
東窺溟渤鰲出波西極崑崙鶴翻影仙人八九彷彿記  
腰繫胡蘆授丹餌食之不老百歲生風蕩入雲宵然際  
年來種菊芳可餐亦聞益壽好人顏千枝萬朶惜不得  
方朝采采商飈寒寒吹老鬢已衰朽潦倒生平惟有酒  
陶潛本是解音人屈平豈稱知味口爐頭時價每苦貴

眼底貧交難數對但願沈酣吸百川客滿杯浮檀板碎  
撥悶

秋村蟬急槐欲黃家家刈稻早登場白首下帷誰者子  
田無二頃搜枯腸大兒織屨腰力傷次兒佐織眼茫茫  
更憐黃口哺糜湯顛倒學步號新孃街頭沽酒酒價貴  
年年種瓜遭亢暘天蓋遠地蓋長鴟晝見龍壑藏人生  
不用多歎恨且把絲竿釣晚江

多難

王國正多難書生亦解兵不堪埋虎氣一擬射狼星萬里將軍目三杯出餞情棄繻關吏識慎爾繼榮名

送李鷹

向夕江雲起遙天帆影飛故人多意氣此別有光輝土酒隨官驛山花上客衣前程須努力休恨鬢毛稀

誅逋

國難誅逋急年飢倒索難繫烟風斷續愁眼雨潺湲已覺幽詩苦何當漢詔寬質衣無出貸不敢怒新官

吟似太目

貧使交情濶閒看物態新  
白雲方閉戶紅蓼正宜人  
不厭南山色相攜小甕春  
竹林猶有伴畢卓夜過隣

不寐

不寐伺晨發披衣月易西  
寒雞疑失候獨雁豈安栖  
壯志成今老新詩失故題  
村村擣衣急又是暮秋期

遣懷

熟睡非吾事迴迴此寸腸  
秋蛩聲太切北斗柄空長  
祇



自愁衣褐誰堪挹酒漿百年牢落裏菊又幾枝黃

登天封塔

突兀出層空明州盡眼中下方疑作雨上界只生風西  
日沈紅樹東流接海宮仰高應咫尺吾欲翹蒼穹

月蝕

誰干天道忌惜此一輪盈得序恒光發非時沴氣乘蝦  
蟇何偏側桂樹本長生呼救煩愚俗終然炳夜靈

皎皎初猶見團團倏已非雲留太陰節地閉小寒輝薄

蝕灾時有分秒數豈微臺郎如許奏警闕在垂衣

小圃

病裏過殘暑涼深小圃荒絕根除蔓草作意怒螳螂遲  
豆猶無莢秋茄不滿筐膜乾能抱甕底事使人忙

起早

不寐晨興早驅兒且賃春雨聲初歇砌日色未臨窓水  
際螢三點空中鷺一雙飯匙已飽噉且得實空缸

吸粥

飢年嗟食玉新稼喜登場薄用為糜粥貧宜惜稻粱老夫  
兼煖胃黃口亦充腸一七松窓下應知意味長

寫懷

投老中懷惡長宵輾轉頻村深荒漏刻雞小學司晨秋  
氣彫高柳寒聲滿四隣側身窓戶裏何事不愁人

鉏園

園功久不理蚤起把鉏時力倦應知廢年衰無可為白  
花零細草赤棘拒疎籬朋舊何人到斜陽又已西

負米

負米憐兒子家貧藉舌耕頻年減研穀何塾踐師盟歲  
熟門為倚秋乾場可登雲山望迢遞歸及慰衰齡

遣愁

天豈私貧我其如傲采薇風騷千古業藤蔓百年扉藉  
暖吹新火防寒綻舊衣曾聞力命辨無是亦無非

雨夜

犇林風作勢徹夜雨傾盆鐘響欲沈寺雞啼如隔村將

無傷晚稼何以聚秋屯墻圯生多盜應違席掩門

撥悶

窮冬畏雨雪邨舍况頽然鳥入窺空廩人來責欠錢上  
書無一字作賦有三千祇羨龐公隱兒孫覺汝賢

不肯

不肯徼鄉曲其如衆所嗔須眉看已老要脅折何人原  
憲無辭億黔婁實可貧百年一具骨山石對嶙峋

度龍山投宿田家

躋險當龍碣穿幽狎虎隣天風驚萬樹野日側孤輪橘  
柚溪邊寺雞豚邨裏人白雲秋片片半落暮江津

雨懷

冥冥江上雨風起不成乾柱礎春蒸濕炊烟曉釀寒忍  
殘花片了擬放酒杯寬門外何人到飢鳥立樹看

閱耕

東作家家急扶犁及早春水田新足雨山鳥慣催人未  
課三年積先勞百畝身杏花邨舍近婦餉會如賓

江上

落落南山曲孤琴寄一家白雲長在戶幽鳥自啼花懷  
望人俱遠登臨日每斜暮年無稱意何處問胡麻

秋夜

落木秋風夜嚴城漏點長詩篇通酒性山鬼避燈光放  
筆人無老行歌道在狂不能櫻俗慮天地信蒼茫

過人野居

騁望松林暮沿河到野居樓間落照裏人卧絕交餘祖

德墓門表婦賢斗酒需竹欄花事訖送客步徐徐

夕

落落寄人境夕烟生野扉竹聲風棄籜松影月留衣貧  
不休詩句閒惟占釣磯所忻塵跡絕吟嘯晚成歸

山行訪人

秋草平郊路蒼茫引望迷數家依絕巘一寺隔迴溪土  
俗沙田芋人烟籬落雞欲尋高隱宿斜日石門西

山中訪人



山秋來碧色步遠更前溪隨意雲孤出無人鳥亂啼石  
橋臨壑起茅屋入邨低擬訪幽居處松行竹个迷

自遣

白首人間世豪雄異往年酒酣猶起舞金盡只愁眠訪  
舊門多閉干時馬不前祇餘衣食累數口正蕭然

曉望

霜清野甸悄無人幾處楓林丹葉新客棹倚村修晚爨  
漁罾歷岸守潛鱗閒來嘯詠經初臘老去栖遲惜小春

節序漸窮朋舊隔曉天何處不沾巾

江館撥悶

江雲欲暮不歸山倒映斜陽雨半殘野水亂侵沙徑出  
人家多掩竹扉閒  
辭春燕侶空泥壘近老儒生敝鶻冠  
歲月似流心似醉何因忼慨一開顏

苦飢

數口蕭然窘殺人此生迂拙只安貧汶陽聞道蹲鴟熟  
一擬移居送老身

孫山人儀

字象可世家三茅象可自田間起年十七為諸生時  
標社長嘉則先生郡中名薦紳余君房屠長卿沈箕  
仲諸公尚無恙象可徧造其門歸益精治經史學馳  
騁古今習國家典故旁及裨官星緯二氏家言無不  
蒐獵數試有司不利客于京師當事欲論薦其才竟  
謝歸象可性廉介自持初學為詩不肯摹唐人音格  
見當世所稱前七子後七子輒唾之喜在佳山水間

每所過酒家梵舍常作詩題壁不署姓名時周貞靖  
先生方為孝廉偶過某寺中見壁上句一讀驚喜起  
拜因曰誦其詩初不知所作何人也後周先生中進  
士出官嶺外聞象可名因延與同往兩人舟行相論  
詩甚驩一日象可出所攜借竹樓集周先生發卷見  
有題某寺壁詩即舊所誦句也更大驚喜重起拜由  
是兩人恨相見晚其論詩益驩凡所唱酬有一語稍  
近世人輒動色相告務力去之至于三濯髓方已周

先生方刻象可詩粵中謂我費民間數片木傳孫先生詩亦不損廉會以事忤勢家解官遂不果象可歸卒于家年八十餘聞所著借竹樓集甚多不得見唯得其清海吟二本為周先生所點定余錄其不甚拗僻者得二十首

雜詩

女大不憐母花開不戀枝蠶老上山坐燕長出巢飛阿媪勿懊惱不憶嫁爺時

至前七日即事

仲冬粵候暄衣袷身稀適放骸藤榻間靜默羣機釋爵  
馴飲類水鼠橫傷巾幘牖敞入微風飈噓妨眠食偶聽  
讀朝報時事更堪啞沙人乘破舟爭坐恣搏擊瀕洞波  
濤中望岸殊懸隔羣惜奚足矜為此沈舟惻昌黎曾有  
言所憂非我力

杏溪道中

蘭陰郭北路砂礫埡急湍白波跳垂日峭峰推碧天是

時梅雨數集澮彌原田道迷篙力窘密緯砮水牽衆艇  
亂流濟排擠相屯遭盤旋滯晷刻跌足號長年須臾人  
語寂始覺舟去便往來綠樹裏抵夕霞靄鮮徙倚船艙  
中且玩林薄妍白頭湖海客忍性成柔綿遠途甫發輒  
遑較延與遑

海口思家

今日天晴明川路淨如洗舟子撥波輕進程過所擬漸  
迎甌海潮舟楫勩有底頓覺客腸紆眺原數窺倚入春

彌月餘百卉色俱起暄餘斜照曛菜麥被之喜梗蒼翠  
葉妍杉松歷可指雖云習習風拂面若撥水掀蓬炙老  
衰繇服殊適已因感昨在家暴陽春未已將身就夕暉  
遷坐牆東幾亂離向二載城野傳搬徙苦懼敗卒殃兒  
信驚滿紙刑斂釀綠林猝變吐嗟爾老稚寡良籌奔攜  
亦情理未卜破竹樓安完免拋圯屋角含桃花向誰復  
旖旎春熙縱溥公人命各亨否途艱汔尾將家慮從頭  
始切近切揣量坐呆飯失匕



餽爵

野田稻未熟林爵窺官厨唧啾久檐端似妨爨僕居雖  
飢不苟下孰謂禽鳥愚嗟為微軀役靈蠢同飢飭固知  
物性在法施規豈虛案頭有白飯適值黏書餘取之撒  
庭宇聊用寬須臾

雨晨早起

署樓寡酬答宴息停繁思有空性量廓靜存營衛滋宵  
眠得美睡放體形氣舒夢稀嘗早寤坦襟得神怡微鐘

移枕候薄雨綏雞時早久雖霖霖物情已自私  
褰帷覽庭曙榕葉生新姿

舟次賀正

風俗他方別年華此日同異鄉朋舊合聯艇  
火烟通酬酢常移酒過從只啟蓬雖更新歲月  
猶抱畏途忡

嚴灘

江山鼓建德幾許不通名一日曾垂釣千秋  
屬子陵亭臺長肅穆比附亦崢嶸借問買山  
隱兒孫幾代更隔岸有方

墓干

秋日縣齋即事二首

無人嘗獨坐得句且微吟到處忘蕉簟行時揀樹陰怕  
登頻望閣小卧必牽衾以此當康濟滋先緩夕沈  
一室戶嘗啟孤眠榻半賒鼠昏偷硯瀋蟻晝上瓶花數  
飲防侵瘴徐飡畏嚼砂朋儕忘我老為插素馨斜

詠邑治之勝

龍巖仙吏宅丘壑簿書兼虧蔽樹垂陰輪流果薦甜鳥

聲嘗到枕山翠日浮簾行路村村去花香匝帷幮

穗城氣候

孰云函載渺青海候全偏衆蛭何曾蟄羣芳不改年難  
明松栢節另闕雁鴻天文字存蒙氣光華斂貝淵

晚步庭際看歸鳥

落照射榕腹羣飛歸鳥情鷹翔殊意氣爵伺善疑驚覓  
食嘗窮日投棲自遠程獨懷鷗泛適浩蕩易為生

固村而上再值惡灘石瀧傾窄湍溜怒奔幾經

危栗始獲離險

水石自相噓艱危人巧投跼鳶溪失毒戒象峽方愁百  
感生殘夜孤心折漏舟詩囊慶無恙且未顧衾裯

初入郡齋呈基仲

翩翩五馬渡江城花信風吹天復晴夾道爭看新太守  
到官只是舊書生兒童守舍供烹茗妻子留家待耦耕  
抗志欲追千古事扁舟記得發錢清

自琴水度砦頭嶺至禾口次唯一韻

筍輿登頓擦硃研晷短偏遭峻嶺賒澗度虬形橋數大  
山分人字路三叉鑿崖徑偈孫緣厠捲草蘆荒鳥作家  
一度藍田原野闢陽坡霜後發穠花

恨老思家

壯遊濟勝暢平生羸老何論儕輩輕鼠伺卧堅公鬪  
蝓欺眼暗肆縱橫冬青變白方初授臘酒迴和釀且傾  
得返竹樓仍穩卧百年養拙縛柴荆

舟行口號

赫曦齋老赴南洲擬外形骸忘鬱攸入楚去吳頻計日  
脫章度嶺復乘流草明屈曲山腰路樹欵逢迎水面舟  
鳴鳥向人猶故國卧艙只作少文游

懷青壁山居

老來畏俗企丹丘買得雲巒幾疊幽奧壁經年惟半日  
溟田十歲少全收自生竹栢樵逾茂不斷山泉熯更流  
已卜一丘繁宿草微軀瞥眼任歸休

夕望

歸燈破暝僧定衲棲嵐得近前溪泊泉聲答夜談

晚霽與客登浩然樓眺錢塘江

晴色開村樹危樓俯大江潮聲翻絕岸帆影落虛窓水  
與遙天合人同夕鳥雙茫茫百端集形影若為降

新月

和杜少陵韻

江月多新意舟人厭屢看孤螢新破暝驚鵲暫偷安逗  
水疑殘照窺窓釀薄寒鄉程憑夢到頻聽葉聲乾

泊巴東



昔行指川北今始詣巴東山縣無重郭江天有斷虹亂  
峰雲欲暝官渡火初紅剪燭供清話蕭蕭暮雨中

大竹道中

半嶺雲封屋千家竹作扉幽泉和石語空翠帶烟飛綠  
轉常侵面陰濃欲濕衣山行疲應接涼月續斜暉

度九盤嶺

間說巖叢險今知鳥道長人傳雲外響馬濕霧中韉秋  
暑蒸蠻雨山花竄異香經營男子事回馭笑王陽

董公子應震

字百里父光宏官少司馬百里有逸才工詩體中文  
弱雖為貴公子不喜盛車騎往來閉門掃坐所過從  
未嘗有雜客性嗜佳山水嘗與詩人泛桓溪飲它山  
泉訪賀監黃冠谷高咏傳一時百里年少猶及從汪  
長文聞隱鱗諸先生杖屨卒年不滿三十所傳遺詩  
僅五七言律一卷

遲汪長文先生不至

草閣遙憐夕徘徊步綠莎空階木葉下疑是足音過山  
鳥時窺席低雲閣拂蘿寧知天外客不肯離巖阿

固鎮道上懷聞居士隱鱗

北風吹斷雁搖落對寒暉野曠無人跡林空絕鳥飛清  
霜欺短鬢朔氣薄征衣獨羨聞居士津梁已息機

宿會亭驛有懷

旅泊傷千里嗟余馬欲渚河魚腥晚市村雨洗寒蕪室  
冷雲栖榻庭虛夜走孤美人何處在惆悵客情孤

同周斗文陳士服游溪下

春色看將晚遙岑帶夕暉青帘斜酒市白鳥掠魚磯烟  
樹暝暝合風花片片飛到來思白社晏坐淡忘歸

度關山

人從盤石上身與亂峰齊卑響春雲碓高寒怯馬蹄林  
疎全見日野曠不聞雞辛苦嗟行役黃塵滿鷓鴣

贈吳養台明府

龍節何來暮謳歌徧草萊冰霜隨地嚼霖雨接天迴澤

雉依人雉山花帶郭開璽書旌異績不負佩刀才

薛千仞湖樓

高閣澄湖畔悠然思獨清看雲舒卷態聽鳥有無聲隨  
意臨書幌尋常對友生更饒真興在時與白鷗盟

尋巖菴

看山意不淺扶屐且同攀樹色潺湲裏禽聲窈窕間磴  
懸千尺迴僧占一峰閒歸路無愁失樵人許伴還

過孤山

萬松立寒翠一水澄湖碧年年車馬來不改孤山色

徐文學陽輝

字元暉為諸生工詩喜學張司業李義山自稱麗手  
亦善填詞所著樂府數種唯青雀舫獨傳屠長卿先  
生有言名妓翻經老僧釀酒將軍擅翰墨之府文士  
馳戎馬之場雖非本色亦有別致元暉愛其語遂演  
為全本其老僧釀酒一篇更為時所賞

過臺城

春草茫無際春禽若有情披荆問往跡知是古臺城  
花慘不發愁雲四際平鵝鴨啞廢沼老檜作鬼聲離宮  
三十六一一巢颺颺臺前古寺暮施食坐老僧吳翁死  
不餓受粒先衆生興亡古所有有泪莫同傾

山居喜晴

積雨曉來霽便若物候好碧霑山紫嵐翠潤溪脚草無  
心乍卷雲有時忽啼鳥蠶眠桑子肥麥熟雉兒飽春響  
烟外村漁唱蘆中島扶筇偶出門遙光澹渺渺

空田行

空田十月淨如掃牛背斜陽立孤鳥綠竹籬邊白板扉  
一道炊烟出林杪寒鴉陣陣風蓬蓬崦西村頭霜葉紅  
隔溪嘎軋水禽起漁歌聲靄暮山紫

托宿鷺鴨村家

泥沙滿面塵撲首兩日路作一日走地冥天長暝色催  
亂山缺處是村口村翁見我偶停鞭便著筵至茅堂前  
四壁雖貧無大厦猶勝潦倒窮途邊更命家人款遠客



網得鯉魚長一尺老瓦盆浮雪蟻香折脚鐺煮霜鱗赤  
敬客還恐擾客眠教兒今夜莫打麥明發飯罷送出村  
為言直北過竹墩沿江再覓便船渡頃刻可到縣西路

蘇小墓

數聲花豸垂楊外水聲泱泱鳴幽瀨春深花落迷孤墳  
蔓草猶疑拂裙帶橋南橋北竹如烟小魂卧處亦千年  
十三吳姬蕩輕楫愛向西陵唱桃葉唱入重臺應動心  
心心化作孤飛蝶

漫興三首

髣几香殘蓬戶閒坐來無事且看山但逢石丈隨羅拜  
每對桑郎一破顏雲縷擁花愁態斂雨絲灑竹淚枝斑  
倏然倚杖踈林下興在飛鴻杳靄間

紅塵喜不到林中寂寂幽居小澗東莎岸雲深栖斷雁  
柴門雨歇落疎桐傷情句為窮來巧失意愁因病後空  
欲覓武陵一片地閒從洞口拾霜紅

小庭獨坐學跼趺恰稱蕭條山澤癯開帙校完訛字眼

倚闌撚斷苦吟鬚閒看曲沼盈魚婢醉聽幽窓落鼠姑  
筆硯近來都廢盡笑人作論學潛夫

此集所選止于萬厯末年惟錄布衣文學之詩  
有稍後之者正以諸君遺草散亡恐後人不得  
其本末宜急表揚使見于世然即如孫象可晚  
歲及與周貞靖先生論詩而其為諸生尚得在  
沈嘉則余君房諸公之門固猶然萬厯中人也

甬上耆舊詩卷二十九

欽定四庫全書

集部

角上耆舊詩卷三十

詳校官右中允<sub>臣</sub>薩敏

主事銜<sub>臣</sub>徐以坤覆勘

總校官庶吉士<sub>臣</sub>朱齡

校對官編修<sub>臣</sub>盧遂

謄錄監生<sub>臣</sub>范廷驊

欽定四庫全書

甫上耆舊詩卷三十

監察御史胡文學編

金處士鑑

失其字與用衡齊名

題棟塘李先生隱居

佳樹森森生綠陰  
索居人傍小江潄  
煖風涼景眠畦犢  
明月高枝憩水禽  
青子肥時春草碧  
紫花落盡夕流深

籜冠藜杖門前路閒引逍遙物外心

金處士銘

字用信以絕句名

山水圖

幽藤細蔓落深青  
虹影霞光石壁明  
月出山空人語靜  
芭蕉葉上動秋聲

悠悠客夢破寒烟  
明月江洲思渺然  
鶴背忽聞橫夜笛  
不知何處是君山

題畫

小茆亭子竹風涼一卷黃庭畫漏長  
童子不言雙鶴夢細推甲子到陶唐

昨夜秋聲到井桐畬田香散稻花濃  
空山落日秋雲薄人在秋雲第幾重

豐處士鑒

逸其字

中夜

感憤思浮海顛連正泣岐客衾孤擁夜山舍久霖時蛩  
響方依壁雞聲未出埭十年薪膽意無處問要離

全處士淳

逸其字

江口浮空閣

乘興登臨意爽然巖阿懸構一壺天隔邛雞大芒屨底  
繞屋雲山竹榻前更想高飛還跨鶴若能住久即成仙  
柴門分付深深閉祇恐行雲攪客眠



秋日天王寺訪楊伯翼不遇

寒林十里聽秋聲，踏入寒莎路幾層。  
雲墮松梢邀過客，霜酣楓葉卧高僧。  
溪舟興盡憐空返，隣酒呼來醉未能。  
落日滿山歸去急，何時揮麈共禪燈。

朱處士應龍

字舜夔，亦字近臣，號東籬。其時沈嘉則先生與葉鄭  
朗論詩，盧九山人與東籬論詩，俱甚懼，人稱爲明州  
四傑。東籬醉飲海上，乘月溺死。其詩遂失傳，諸家所

選東籬詩俱非其意得者余從朱氏覓得樂府一卷  
為錄數首

短歌行

人生幾何樂少憂多彼逝者日如江如河一解歌當以

謠莫如心勞何以忘憂惟有松喬二解我思故人在河

之瀕欲往從之度涯涉津三解皎皎月明駕言宵征唯

君之故不遑自寧四解桂楫蘭舟汎彼中流今夕何夕

載酒遨遊五解臨風鼓瑟中心弗鬱弗鬱者何所懷非

一六解 黃鵠高翔日遠故鄉徘徊中道風雲激揚七解

山忘其高海忘其深智哉古人實獲我心八解

悲歌

得書如見故人寄書如見故鄉心念久客感結自傷欲  
留無親好欲歸無舟車忼愴不能默泣下沾羅襦

懊懷歌

白航張青帆載儂歡子去風生柳樹間飄揚落何處

桃葉歌

桃葉復桃葉下覆根與柯渡河今已慣不復畏風波

子夜歌

相約采芙蓉來往湘江邊湘江雨方重無晴不見蓮

柴處士應聰

字仲初屠田叔先生壻也有詩名屠長卿集首載讓  
柴仲初不至書即其人也所著自怡集

同王太史李孺登吳山飲大觀亭

大觀何處好絕壑俯東溟林密纔通徑天空獨有亭潮

來江氣紫雲共海峰青四顧心雄甚狂歌酒半醒

聞仲連招飲董母墓上得江字

春色正茫茫相攜上釣艘桃花迷遠渡天碧影空江古  
墓苔侵碣荒祠樹作幢一時酬此恨千載重吾邦過客  
都如阮山翁獨似龐古今真易改意氣最難降饌入銀  
絲鱠香浮淥酒缸看松雲片片步壑水淙淙飛去花無  
數啼來鳥一雙歸舟愁日暮夜雨急蓬窓

吳處士浩

字惟直呂中甫山人所稱同里論詩首舉惟直而其  
集失傳俟覓補之

候潮之定海

江樓歌罷酒方醒  
畫艫如飛帶曉星  
萬浦晴暉蛟浪赤  
兩關秋色虎巖青  
沈浮白日漂長劍  
汗漫神州憩小亭  
白髮何人猶下釣  
寂無車馬到滄溟

余明經經訓

字生超文敏公之孫也少有異才年十四以明經貢

予鄉至京師與屠田叔蔡子行二先生同賦詩唱酬  
屠蔡俱詞家宿老生超年少一日而與齊名今所傳  
薊門游草是也未幾歸里門生超旣負才誕放娶妻  
如許允婦婦死為其家所辱因客死吳下蘭摧玉折  
識者哀之

感事同田叔用拙作

歲月寒仍小牛羊草不黃嚴凝看氣象明盛在隄防播  
穀憂恒豫維桑計總長平生蘿薜事投足恐踉蹌

去年西土役宵旰急羣才雨雪三邊盡英靈九廟開成  
功無曲突議論有登臺誰決河隍水崩城竟可哀

宮人斜

絕有蛾眉恨都從此陸沈春羅芳草合秋扇夕陽深棄  
置空懷舊淒涼總屬今猶疑待恩澤存歿見天心

洪光寺

曉色尋山勝幽怡只此偏巖懸垂樹迴磴斷雜雲還信  
美非塵世虛疑隔化天羣峰行欲墮曠邈識孤騫



清涼寺

鳥道盤千折松門到一區  
曇雲幾朝夕豐碣竟模糊  
殘燒依霜葉空厨失午舖  
天寒增蠟淺深殿肆蒼巖

陳文學瑛

字宣遠有詩名一時詞客以詩律相往來盡見集中  
唯宣遠與仲初所傳詩絕少當更覓之

蔡子行先生見過出示新詩復對庭梅有咏奉

酬一首

冬、日南窓好翻書，頗自憐。忽來高士，駕喜誦白雲篇。心與寒花合，情隨幽草偏。開襟取一豁，吟對夕陽前。

李處士時魯

字得之，沈嘉則先生與論詩，延在家塾，遂得交一時名士。晚年更與胡百藥、孫象可唱酬，其人誠可與言詩者也。

訪胡百藥任君文不遇

雙鴻度寥廓，悵望白雲層。脩竹迎人近，高樓接樹平。鬢

疎風易響衣冷酒初醒相送惟聞霰蕭蕭江上聲

無壁

茂陵徒四壁無壁更何如竹影通羣雀藤陰走蝨魚日  
窺空室徧風卷一床虛剩有烟霞色朝朝落卷書

沈處士公孫

字穉僑與李得之唱和

久雨

五月經旬雨愁懷何日舒螢流郊外草蝨蝕篋中書綠

暗雲生樹溪平岸出魚終朝無客到把酒自踟躕

陳山人大魯

字穎叔初余君房沈肩吾箕仲長孺諸公有甬上七  
子之目穎叔其一也穎叔精于史學嘗上取羲皇迄  
于元論斷其事盡為有韻之文名曰詩史聞其卷帙  
甚多吾友陳子遜所藏僅首卷為錄二篇于此亦足  
徵其史學矣

黃帝

軒皇初授禪弓矢事橫征五十有二載遷徙衛師兵迎  
日以推英蓋天乃象形調厯六術總翼德七輔并設臺  
圖入夢記言史載青染采辨章服躬祀親蠶耕杼浮制  
舟楫蓬旋始服乘巢鳳徵文始游麟感木精葉茹戒丹  
書靈簡涵內經化理樂華胥端拱履昇平空同訪至道  
一再如廣成採銅神鼎就騎龍云上昇屈軼尚無據烏  
號未可憑愚生千載後惟聞歌德聲

巢父許由

吾道有隱見達者蹈其幽儻悉起巖廊何人卧林丘堯  
舜相為貴重貽箕穎羞放情山水間四岳等雲浮一瓢  
猶自多滌耳惡來求欲飲懼汙犢鞭之趨上流胡為今  
昔人往往重斯傳不難官稷契未易屈巢繇

李山人先嘉

字之文家在城北偏先賓父在東偏二人並有詩名  
楊伯翼詩所謂城東有李生城北有李生是也後以  
子遵貴封御史

東莊即事

高天不礙四山青  
埜色蒼茫草木平  
新水秧田斜下鷺  
夕陽花嶼亂啼鶯  
橋邊貰酒堪行樂  
隴上遺書日課耕  
車馬不來塵市遠  
儘教白晝掩山楹

許處士震亨

字子長有旅游集

春日山中即事

春來長晏起林靜  
日初晴鳥雜難憑  
語花多不辨名峰

巖窺戶牖臺榭枕江城忽抱鄉關念含毫賦未成

吳山人柱

字石父少工于詩嗜酒亦喜鼓琴有名于時

李景洪小山築成隨贈

滿目借雲山林泉競瀟洒主人無長物隨地栽梧櫟羣  
峰晚作陰萬木秋成赭適意慕漁樵放浪追風雅幽獨  
本吾師榮辱何為者荒城雉堞雲落月魚鱗瓦聊作遂  
初游豈尚耆英社



張處士子魚

字長鱗少工詩亦精篆書

有感

骀儼非吾事浮沈天地間  
道能存白日貧不妒青山  
歲月容瀟散風塵任往還  
未能逃世外空自惜衰顏

杜文學受泰

字蒼舒少有詩名早歿  
余嘗見其佳事園遺草一卷  
今不可覓矣

寄仲連

自愛衡門著皂冠  
談玄風落鏡湖干  
清齋對客無長物  
插徧梧桐與合歡

董文學大晟

字揚明有歎廬集

曉炊

綠烟微竹裏紅葉到窓前  
隣舍晨炊動鳴禽  
喬樹巔誤疑身共棄  
是否偓耶錢  
還問山妻道胡麻熟好便

孤山

月寒天碧浸西湖  
鶴影歸來半有無  
人在一簫香氣裏  
空亭占得小山孤

楊太學德遵

字公路

步至郊園隣人有以新茗餽遺者

步轉水田鬱人來竹徑涼  
當池蒲正綠隔岸柳偏長  
鬪雀趨藜薄啼鶯近小堂  
比隣何雅意新茗送余嘗

自鏡水蕩舟至小溪

窈窕澄溪路蒼涼九月天岸迴頻下禁沙擁急奔泉野  
館青帘出漁家赤網懸到來山盡暝孤寺起寒烟

李處士德進

字退思號枳楊為人風儀秀朗喜言詩不拘聲律先  
輩甚稱之

雨中與隱父叔獨對

雨竹淡無色庭梅癯有神鳥聲趨耳換鵲髮上頭新幽

意惟春草高懷亦古人蕭蕭相對處言笑任天真

江上

落日滄江上芙蓉未肯開小船乘水去孤篷趁風來作  
勢當秋急移聲入夜哀相看多寂莫搔首重裴回

庭梅

昨夜東風吹動初庭梅早見一枝舒但從雪後看逾老  
纔到花時影復疎地靜常容窺客座歲寒終稱護吾廬  
他年杖策攜雙鶴深向羅浮最上居

黃文學嘉謨

字英言

溪曉

山深日未出舟小一溪孤麥浪隨風偃松濤隔岸呼沙  
明驚宿雁星沒散飢烏霜鬢清潭照鬆鬆白映顱

董文學世登

字善如性至孝為諸生有名少工詩喜為奇句世居  
甬江千園廬花竹家有藏書客至剪韭擊鮮欣然也

以其學世授子守諭官戶部主事是為次公先生孫  
道權即吾友巽子也遺詩數卷藏于家被火失傳僅  
從詩括中錄得一首為惋惜久之

千丈巖

峭壁渺難攀仰睇殊可詫仙人撫玉掌指顧移崧華女  
媧立太清日月走跨下雷雨閑烟光冰玉響空夜直堪  
起乘風翛然隨羽化

董處士雋

字仲顓有亦愛廬詩

城眺

睥睨千山遠旋迴萬壑通城高不礙日樹小亦迎風極望人烟密孤吟海月空鳥啼猶夕照踏破翠雲中

李文學德孚

字子尹善詩畫有白華軒集

除夕

客館逢除夕鄉愁覺更頻囊錢看漸少緼被力逾陳歲



換憑春酒時消併臘薪人情與客意明日一番新

有感

憶昔曾從燕市遊酒人聚飲日無愁羽林健士都虛籍  
車騎材官任白頭輸輓東南真竭力經營西北豈虛謀  
只今烽火頻年急便是鄉關也繫憂

虞處士伯龍

字公普有擔簦集

舟中

寥落明州客孤懷寄短篷江豚偏謔浪舟子但呼風歸  
夢隨流水鄉書問去鴻不知今夜月千里可相同

陳文學來章

字士服有歛月樓集其人豪士也

醉言

客饋麴君殊太虐清明大醉鷓鴣杓舉杯問花花不言  
酒正使人人可憐春陰細雨苔徑滑倉庚欲喚枯桐發  
夜讀窓前萬卷書朝看室內釜遊魚李杜聲名燭天表

當時際遇何草草制科只重宋儒疏子虛長楊向誰賦  
高才名德惟王公一言落筆蛇為龍亦知肉食非長慮  
紛紛都向此中去青衿才士狂且貧白眼少年目攝人  
春風花柳年年路埋沒英雄不知數平津閣廢空落霞  
誰能干謁王孫家縣官督稅如哮虎蓬鬢蕭蕭坐環堵  
籬脚踈篁無力種床頭雄劍強起舞不如衣沽酒酣  
青天目送碧桃花下釣魚船

憶事

萬戶秋聲到草堂去年馬首是他鄉五更霜雪欺人白  
十月風塵刺眼黃貧比監門猶慕義醉從燕市不禁狂  
歸來七尺渾如昨蓬鬢雄心一夜長

買小罾

小罾買出老漁家高傍長堤淺傍沙不為貪魚逐江岸  
一天春送白楊花

李文學德星

字子五有栩栩集

客舍

一天潮擁海門東  
月照殘更樹影空  
啼鳥盡情催夢起  
不知人在故鄉中

范文學鴻儒

字非鳧所著茗柯集  
此公詩殊有老氣  
惜未得其全集錄之

苦雨

暝合天全黑  
雲垂壓短牆  
漏痕成古篆  
雨脚立新簞  
嶽

色侵衣桁嵐光溼印香莓苔隨地綠天氣近梅黃

夜雨憶莊天目

長歎燈花落蕭蕭獨掩門流螢依茵閣鳴雨戰山邨得  
句誰酬我支頤自憶君最憐生計拙浪跡共浮雲

旅思

落日上高樹涼風吹葛巾月于今夜滿僕在異鄉親客  
泪看花淡愁懷縱酒頻蕉聲與蟲語偏逐苦吟人

中秋後一日訪棲真寺

秋色徧江津  
菰蒲露氣新  
亂山迎拄杖  
落葉趁行人  
白紫吾知已  
青松佛作隣  
雲心與水性  
彷彿悟前身

屠文學惟忠

字文將

田家即事

小圃聯茅屋  
疎籬護水門  
寒風催落木  
埜色散朝暎  
刈稻腰鑣出  
祈神社鼓喧  
坐看放犢去  
溪步入前邨

袁文學時起

字當世

秋夜

拔劍雄心在驚看去日長  
碧梧秋欲老虛閣夜生涼  
有淚蟲吟砌無眠月到床  
今宵千種慮都作鏡前霜

董太學應禎

字茂先有白壁齋集

虎丘晚眺

愛此丘中勝憑欄又夕曛  
水深魚競集徑密篠難分  
枯



樹巢新鵲空臺宿老雲千人惟我坐瞻顧歎離羣

送伯齡叔就試南雍

八月仙槎向夕城西風吹捲暮潮生雲連別浦蘼蕪暗  
夜泊官河絡緯鳴臺上雨花飄客思渡前桃葉送秋聲  
下帷應念堂垂白蚤為江都繼令名

張文學應芝

字皇符

灘

逝此東歸急深隨春漲行不時驅雨勢無候到潮聲破浪誰相得奔波只自驚邙知雲碓裏安坐擣香粳

章訓導載道

誤入

字長興沈文恭之甥也有詩名亦工于書法所著竹圃集

之姚江西津夜泊

夕陽辭古渡潮落且停艘雨氣紅奔電風威怒捲幢一  
輦航越水百里辨姚江不寐看殘月清光逗短窓

李文學坤元

字公簡其先宋名臣禮部尚書育本青州人後徙家于鄆凡八葉進士以孝友世其家至弘正間有曰南塘翁益擅至行始卜宅社南人稱社南李氏公簡即其孫也少能傳家學為名諸生性至孝事父母疾不緩帶居喪哀毀盡禮有兄弟六人友愛備至後分居推田讓宅惟諸兄弟所得始受其餘凡六試于鄉罷歸乃益專心學問嘗言為學在躬行但能不愧俯仰

始足稱儒者里中俱宗之年七十三終于家後人世  
多賢者

自述

兄弟嘗難得吾家有六人後先惟一母吾汝不分身花  
月酬良夜琴尊答令辰扶藜偕出入此外復誰親

宿堃寺

松林日暮寺偶借一龕眠檐雨難成夢燈花亦結禪空  
香分四座清磬肅諸天此夕閒相對勞生暫息肩

題扇

春山寂寂水徐迴  
隔岸桃花似扇開  
曳杖定尋紅處去  
却無人過石橋來

題畫冊

山深一路樹冥冥  
僻處兼無鹿跡經  
不信有人閒布置  
臨溪結得小茅亭

高文學葵

字伯陽三水令瀛之子  
少有才天歿屠長卿先生叙

其遺草

山寺

此日遂幽尋空山落欵吟白雲樵徑僻黃葉寺門深十月有春氣一僧多道心相看無別語不辨是西林

李記室德述

字子述少為名諸生能詩有經世意喜抵掌談天下事壯歲入閩與曹能始先生徐山人煥稱詩相唱酬因有名晚年復遊塞下為開府左公記室時與論兵

畫奇策所向有功當事方論薦于朝會以疾卒曹能  
始為刻其詩閩中

莫春赴曹能始觀察酌浮山堂限韵

為踐浮山約穿林及曙晴岫雲吞更吐川路暗猶明稍  
憩支筇力旋逢倒屣迎堤紆環澗曲巖迴構臺橫飛極  
通無際奔湍聽有情蟻行臨木杪雀躍見潮平漠漠陰  
霾重飄飄江鳥輕振衣參古佛瀹茗品泉清洞壑形殊  
幻岡巒勢若并暫從雲磴下陡覺雨痕生登閣將觀荔

拏舟始漾萍老柳淪浩渺平楚出崢嶸舞見松間鶴啼  
聞谷口鶯柳綿看盡脫荷蓋喜新擎總羨籥籥徹時令  
樵採行有容瞻廣大無競識貞誠自是天為設誰云力  
可成輞川何足貴梓澤亦虛營坐密觴頻把談高語欲  
驚莫烟交水榭積霰散窓楹勝集良非偶佳篇敢後賡  
自茲還海上不用訪蓬瀛

寒食

十載逢寒食家家火盡然却愁窮巷裏先有斷炊烟



汪山人彥

字穆如所著曰雌溪草堂集山人晚年嘗與先公賦詩相往來尚識其名氏觀海一篇最為詞家所傳

移家

稍于城市遠漸覺物情新溪鳥垂頭立山猿接臂親秦宮空有樹漁父本無隣或恐桃花誤還當二問津

南越舟中懷杜言開士

把手東林別塵蹤遂遠遊千山猶落木一歲半行舟短

燭飄殘雨疎鐘應碧流知君魂夢靜尋不到羅浮

與沈源美杜言登候濤山觀海六十韻

浩淼乾坤裏緣蘿陟寶坊披軒汎容與適意縱徜徉粉  
堞潮聲撼青峰練影涼九州分控帶萬里盡微茫直是  
奔元氣寧容遡濫觴偶時能震地何谷不遵王受露疑  
無底浮天似有傍乘衰輸巨壑避礙度迴塘險阻蛟門  
設咽喉鼇柱當及秋風作浪未曉日登光形勝猶同昔  
蕭森此一方數九占漲汐跳沫走平岡白晝驚鳬夢寒

靈失雁行收鮮歸近浦濯網掛危樯積濕衝衣潤淪陰  
合岸黃懸洲歌伐木鬻渡競鳴榔島濶潮難應流深巔  
顛強濤翻如峭壁瀾靜即康莊浪指尾閭洩虛傳鱗穴  
張無繇窮地脈總道接天潢海味居民熟風波過客嘗  
大魚吞雀舫姹女舞霓裳蜃結孤樓迴鼇擎別嶼長援  
琴情易寫銜木恨難忘入水禽形化凝鞭石血藏揚塵  
說清淺滿屋記滄桑方士憐徐福飛仙笑始皇當空餘  
鳥道寥廓斷鼇梁梵剎遺金鉢蓬瀛敞玉堂潛靈時出

沒陰火暮輝煌牛啖紅蓮鐵人餐白石糧本非塵世界  
只在水雲鄉肉骨少輕舉真如莫闡揚畏途正洶洶東  
海自泱泱注頻觀葦炊烟遍煮霜珍奇資興府捆載  
集行商盤淚鮫人泣冰蠶泉室將權征多踞虎朝貢久  
無狼遙望鯨鯢窟還憂魚鱉殃徵兵聞羽檄移汎戒餘  
腥不犯斗牛象誰殲金虎芒鴻冥青漢冷龍螭紫雲荒  
一嘯陽侯遁三山神漢香翼從沈髮北愁已散眉睂魯  
氏偏逃爵任公肯釣璜呼開關九豹吹落管雙凰所見

銀宮闕應銷土胃腸烟霞因世癖傲晚覺身妨色界冥  
濛老年華搏激忙蓬飄隨泡聚機息共鷗翔薄俗渾皆  
濁吾生且獨狂珠遺聊復隱蟲測邴能量河伯趨堪歎  
波臣語漫傷掀髯照塵幘回首問慈航桂樹搖明鏡笑  
容吐碧銚懷材方百六選勝豈尋常歷覽真都幻登臨  
殊未央眼前襟曠蕩杯底興淋浪禪月頻揮塵佺期屢  
據床醉來攜手去箕踞看扶桑

屠文學金樞

字西昇長卿先生子也

悼內

南國名花映夜舒  
亭亭猶憶碧窓虛  
可憐陌上遺鈿路  
不得重經油壁車

沈氏天孫附

字七襄宛陵人沈君典太史第三女也太史與長卿  
先生交甚懽遂通昏姻以七襄為西昇婦七襄既歸  
屠氏日與長卿女湘靈論詩每徵事紬書分題授簡

紙墨橫陳朱藍狼藉長卿夫人亦知文值有諷詠輒就商訂焉長卿詩曰封胡與遏末婦總愛篇章但有圖書篋都無針線箱又曰姑婦歡相得西園結伴行分題花共笑奪錦句先成信一時之盛事也不數年兩人相繼天歿長卿為合刻其詩行世

同時李氏大純字貞君士人袁雍簡之婦朱氏德璉士人吳岳生之婦也俱能詩大純病中懷夫壻有曰  
暖風却怪掀簾箔涼月何心到芰荷德璉寄弟有曰

天邊雁陳都成字壁上蝸涎宛作書並佳句足傳也

自君之出矣

自君之出矣孤月鑒虛牖思君如飛花隨風不回首

子夜歌

亂雨飛翔雪凍雨催春暝不念郎身寒所畏郎心冷

游仙曲

青溪白石出胡麻香煖瑤池九影花見說元都無甲子

春光常住阿環家



宮人入道

曾住花前七寶臺  
守宮玉臂映蒼苔  
香消粉盞晨奩廢  
涼入鐙幢夜雨哀  
鵲鏡化為春月白  
鳳裙留作野花開  
辟寒金在啼痕盡  
却伴東華采藥來

屠文學一衡

初名玉衡字仲椒  
長卿先生次子也  
為近體詩秀色  
欲掩其父

落日

旅泊真無賴，羈愁任闋寥。  
長天沒歸鳥，古樹自前朝。  
暝雲歸壑，風清水注瓢。  
漁梁爭渡口，牽挽過溪橋。

涼思

潋灩波光細，空明藻荇牽。  
清飈生几席，涼思起樓船。  
避世疑無地，尋源別有天。  
滄浪問漁父，把釣意陶然。

暮烟

暝色收殘照，牛羊下遠汀。  
半籠濃淡樹，微見短長亭。  
燈火千家社，蒿萊田父扃。  
蕭條邨巷裏，牧笛不堪聽。

沈文學當路

字齊卿嘉則先生子而葉鄭朗之壻也

冬日留諸友酌豐對樓

共倚高樓望渺茫一杯欸欸話斜陽  
簷前病葉同吾老隴上疎梅為客香  
笋味初腴供瓦鉢布袍半軟襯繩床  
登臨此會人猶健秀句分拈得雁行

沈文學雲沖

字龍侯箕仲先生子葉鄭朗為叙其詩

桑社

歡呼桑柘裏，鼙鼓弄新晴。  
葉底清尊滿，花前白髮明。  
傲然社祭酒，何事漢公卿。  
已不勝杯杓，鶯啼更有情。

送孫象可客丹陽

天地堪為旅行踪，  
逐去萍亂雲迷北固斜。  
日到孤城命以安，  
時達身因善飯輕。  
射潮須努力，聊慰故人情。

沈文學泰漳

字士清，長孺先生子也。  
少為諸生，晚年棄去屏居一

室中即家人罕接其面有詩曰玉槎集

舟進小溪

錯記邗南路循涯到北溝水扶溪石走魚冠荇花浮鳥  
語爭傳夕松聲乍報秋道迷何處問漁艇隔前洲

愁雨

原田垂可獲夾日雨緜緜稻是眼中飯人看頭上天困  
中虛閤鼠爨下待生烟共向邗祠祝能晴尚有年

蔣文學之麟

字龍友余君房先生外孫也有紀游集

鹿田寺

翠律倚層霄山空木葉凋石僵田卧鹿寺古徑通樵折  
茗甕中供前峰座上朝憑高弔玉女桂隱若為招

三河夜泊

白馬嶙峋俯睦城三河古戍舊時名夜來風雨溪聲發  
似為將軍洗甲兵

戴處士興世

字日觀

登棚墟嶺

峻嶺不可極窄步難為前數里盤松蘿百折愁攀援蹈  
險力已疲獲奇心自偏雙屨亂雲脚滿眼生高烟蒼崖  
挂殘雨紅壁飛鳴泉石墮不到地峰攢盡劃天明河鄴  
下轉帝語從空傳魍魎白日出山夔當道眠杳杳聞吹  
笙真得逢遊仙下嶺發長歎兩腋風翩翩拂衣坐白石  
松颺起晝寒

周文學朝俊

字夷王少有才為詩慕李長吉亦工填詞所撰有李  
丹香玉人紅梅花十餘種惟紅梅花最傳先伯父玉  
海府君為蜀中營山令縣在萬山中地最僻初至縣  
中士大夫具酒延令君奏樂伶人呈劇目所列三本  
復前白云唯紅梅花可登場後先公官嶺外每宴客  
諸伶人無不唱紅梅花者其為世盛傳若此

野田行



落日西山頭野田秋草沒羣鳥噪夕暉荒畦吊古穴樹  
老白楊根草漬青狸血淒澁寒塘風蒼涼孤冢月當時  
泉下人曾此痛死別

雪中候屠田叔先生門

白雪下歲粧飢鳥隔樹窺先生眠未起小子立多時駿  
骨傷寒素春姿老凍黎癡奴不解事呵手弄冰絲

馮文學元珣

字羽上通判應奎之後也亦能詩有讀書樓草

懷舊

南郭懷陳子癡狂亦可憐  
儘將詩度日不問橐無錢  
落日寒城古荒墳宿草纏  
傳家猶有業應待子孫賢

袁文學慶裕

字章卿博學有詩名所著萆苳溘然二草

餉午石門館中次壁間某工部韻


怪石截蚪屯誰開霄畔門  
帆檣渺若駛鳶鷂儻為閭  
老我乘危屐迷魂失故邨  
清風一披拂穆爾破幽昏

楊文學德遜

號芋翁

連雲棧

艱難雲棧馬辛苦野邛餐墮膽跨三全驚心渡七盤午  
過麥飯冷更盡草牀寒遠愧王陽轍迴將膝下懽



甬上耆舊詩卷三十